


Woosoo dat
wóóter in d' säj
solt is

'n ol fräisk ferhóól
näjs upskreeven döör

Oen Diirk Feldman



2. uplóóeg

©2024 Onno Dirk Feldmann

uutgeever:

Onno Dirk Feldmann

Rajenstr. 68


26810 Westoverledingen

drük:


epubli - 'n denst fan d' neopubli GmbH, Berlin

Biblioogóófsk inf'rmóósje fan d' Düütsk Nóósjenóólbibtaik: Däi
Düütsk Nóósjenóólbibtaik ferbaukt disser publikóósje; nibber
biblioogróófsk dóóten bünt up 't internet oover <http://dnb.d-nb.de> tau ferkriigen.


Dat was inset 'n läief kreegel fent, däi haar nik's up d' weerld
buuten 'n blién bæep un 'n skranner küen. Doo häi tau d' skaul
uut kwam, wur häi fan 'n skeepsjung un sul up siin êerst törn
góón. Doo sağ h' woo siin näej kamróóden mit skier geld
spööldent, un häi haar nik's, näit ins' 'n lütje daajtje.




Dat mook hum läip biidrøyvt, dat häi 't bii d' bäep klóógde. Säi biisun sük 'n setje, dan tjükselde s' achter up höör kóómer, hool 'n lütje oel möölen fandağ, gaf s' däi fent un see: »Doo duu teegen disser möölen säegst fan: Möölen möölen móól mii rôod dukóót dank ik dii! dan móólt s' dii eemer dukóóten, woo fööl duu hebben hebben wult; un doo duu säegst: Möölen möölen, stóó nuu stiel, heb al miin wiel; skaajt säi uut 't möölen; un düs kaast duu dii âal dingen, däi duu dii wünskern daajst, fan däi möölen móolen lóoten. Man fertel nüms d'r fan, anners geböört 'n groot unlük!«




Däi fent biidankde sük bii siin bäep, see fan forwal un gung up 't skip. Doo nuu däi kamróóden al weer höör skier geld um d' hâan haarent, stelde häi sük in 'n düüster hauk un see: »Möölen möölen móól mii rôod dukóót dank ik dii!« Doo mool däi möölen eemer rôod dukóóten, däi klöyternd in siin leeren pôol fullent. Un doo däi pôol ful sat, see häi man: »Möölen möölen, stóó nuu stiel, heb al miin wiel«




Nuu was häi fan âal kamróóden däi rïikst; un doo 't höör 't al tauhôop an spîis undbrook, doo dat 's móóls geböörde, um dat däi skeeps-kumdöör läip nóóterg was, see häi bloot: »Möölen möölen móól mii frisk bollen dank ik dii!« düs mool säi soo lâang, bit dat häi fan 'n anner spröökje see; un wor häi anners no grap an haar, als mool däi lütje möölen.




Alt'meeds froogent hum däi kamróóden, wor häi däi môoj sóóken weğ kreeğ; man doo häi see, häi düs 't näit säegen, drungent säi d'r näit up, f'dan doo häi 't âal eerelk mit höör däilde. 'T düs näit lâang, doo kreeğ däi kwóóed skeepskumdöör d'r wind fan, un up 'n óóvend kumdääärde häi däi skeepsjung binnen siin kejüüet un see: »Hóól diin möölen un móól mii frisk hóóntjes!«



Däi fent gung tau un broch 'n körf frisk hóontjes. Man d'r was
däi godlöes keerl näit taufree mit: häi sloođ däi fent soo
biidröyvt lâang, dat däi hum däi möölen hool un hum see, wat
häi säegen mus, doo s' móólen sul; man däi anner spröök, däi
me säegen mus, doo s' uutskaajen sul, leerde häi hum näit, un
däi skeepskumdöör doch d'r ook häil näit an, hum t' fróógen.




As däi fent lóóterweğ allenerg up 't rauf stun, leep däi kumdöör
nóó hum tau un stöt hum in d' säj un doch näit d'r um, woo
fööl söerг un mâajt fóér un mauder in hum stopt haaren un
woo däi blién bæep hoopde dat häi weeruem kwam. Um âal dat
doch häi näit, man stöt hum in d' säj un see, dat häi melöört
haar, un dücht'de dat 't d'r mit gaud was.



D'r nóost gung häi up siin kejüuet, un doo hum solt undbrook
see häi teegen däi lütje möölen fan: »Möölen möölen móól mii
wiet soltkörrels dank ik dii!« Doo mool s' eemer wiet
soltkörrels. Man doo däi nap ful was, see däi skeepskumdöör:
»Dat langt!« Man säi mool altiid feerer, bit däi häiel kejüuet ful
was.



Doo foot häi däi möölen an, dat häi s' ooverstüer goojen kun,
man kreeg soo 'n slağ, dat häi biiduust up d' grund ful. Un doo
mool s' altiid feerer, bit dat skip an 't sinken fung, un noojt haar
grooterder nood up 'n skip west. Up 't läest nam däi
skeepskumdöör siin gâaud sweert un tohoo däi möölen; man
kiik inset! uut elker stük wur 'n lütje möölen, däi net as däi oel
was, un âal möölen moolent eemer wiet soltkörrels.



Doo biiful dat skip siin lot: 't fergung mit man un muus un âal möölen. Man däi moolent unner up d' grund no altiid eemer wiet soltkörrels, un doo duu höör ook däi räecht spröök tauraupen deest, säi liegent soo däip, dat s' dat näit höören kunnent.

Kiik inset! D'r is dat wóóter in d' säj solt fan.

